

嘉慶松江府志

松江府志卷五十一

古今人傳三

明

袁凱字景文其先蜀人占籍華亭父介字可潛元末爲府掾以詩名吳中凱長身古貌言議英發尤長於詩洪武三年以布衣召拜御史上言國家盪平四方固資將帥之力今天下已定將帥多在京師其精悍雄傑之士智雖有餘而於君臣之禮恐未悉究臣願於都督府迎致通今學古之士或五人或三人於諸將朔望早朝後俱赴都堂聽講經史庶幾忠君愛國之心全身保家之道

油然自生天生人材無非爲天下國家計羣小有犯固  
在不赦至於老成長者或有過誤宜加矜恕養其廉恥  
以收他日之功則人材輩出矣上嘉納之遂敕省臺延  
聘儒士於午門番直與諸將說書故老相傳上一日錄  
囚畢令凱送東宮覆審遞減之凱還復命問朕與東宮  
孰是凱頓首曰陛下法之正東宮心之慈後以疾罷歸

卒所著有在野集朱應祥爲之序

郭志名臣

錢全袞字慶餘祖福宋承務郎自錢唐徙居華亭遂爲郡  
人全袞通涉書史好禮尚文元末張氏據吳隱居盤龍  
岡不爲所用著有韻府羣玉掇遺續松江府志子徵洪

武初舉秀才。褰以清心潔己忠國愛民八字書於簡以

授徵後任綏德州判官。能承父訓爲政有聲。

郭志隱逸

秦裕伯字容卿號景容上海人祖知柔見流寓父良顯元貞初詔所在州郡習蒙古學良顯游大名從師蕭氏盡究精奧大德閒以薦授國子學錄尋授浙西樞轡使致仕歸裕伯幼從父宦游京師占大名籍由胄監登至正四年進士累官福建行省郎中會世亂棄官寓揚州久之復避地上海居母喪盡禮張士誠據蘇招之拒不往吳元年太祖命中書省檄起之裕伯對使者曰食元祿二十餘年而背之是不忠也母喪未終忘哀而出是不

孝也乃上書固辭洪武元年復徵之稱病不出帝手書  
諭之曰海濱之民好鬪裕伯智謀之士而居此地堅守  
不出恐有後悔不得已拜書入朝授侍讀學士固辭不  
允二年改待制旋爲治書侍御史三年與御史中丞劉  
基爲京畿主考官裕伯博辯善論說占奏悉當帝意帝  
數稱之尋出知隴州以疾辭歸居長壽寺里卒卽葬其

地

上海志

何潤字子潤華亭人吳元年大將軍徐達圍張士誠下松  
江府辦城輒九千萬送京師知府荀玉珍令兩邑民均  
辦民胥怨錢鶴臯乘機發難振臂一呼燦至蠶起四月

剽據府治開倉庫殺知府苟玉珍囚知縣馮榮袁浦場  
官李肅袁普等遠近騷動潤收瘞玉珍隨詣錢日叩首  
願以十口保知縣命鶴臯知馮良吏聽之榮等得免民  
老穉不能出城避難者悉置縣後堂供飲食及指揮葛  
信將兵平定恣行剽掠潤具羊豕酒醴迎犒又率父老  
謁大將軍於龍井莊拜謝以其殲渠魁赦脅從也大將  
軍賜食而遣之松遂安先是府司八印俱失馮捐資求  
印潤曰私藏者罪彼必不敢出急則投水火耳乃自署  
書出賞約曰印初責潤藏護不謹致失願出金贖印遂  
出先是潤嘗設肆售寶玩富民郁氏以蠙珠數百顆寄

售直千金亂後郁謂珠已剽略不復措意潤悉歸之楊

維禎錢維善陸居仁陶九成皆爲作傳

郭志獨行

徐進字德卿華亭人輕財好義嘗割田萬餘畝建義塾以淑鄉之子弟有貧乏者過其門必周卹之無倦容子彥裕挺特峭拔工草書善騎射洪武二年以縣學煥於兵卽義塾改爲縣學彥裕復捐資充拓告成王逢袁凱竝有詩紀之

郭志獨行

錢復亨華亭人能文善醫洪武元年詔所在有司訪舉懷

才抱德之士薦爲嶧縣教諭著講餘集

明詩綜

張壁字景辰陳留人徙家華亭洪武三年開科取士壁應

舉中式與同郡俞嘉言陶南村李處仁爲文學友仕終

蜀府典寶

陳志  
文學

杜陽字宗原上海人宋祁公衍十一世孫祖元芳元德清  
蒲父希仲水軍萬戶俱有文名陽洪武初中詞科爲太  
常贊禮郎奉使緬甸詰其不庭卒以其人入貢稱旨授  
禮科給事中以疾歸凡兩賜手書存問卒年三十三所  
著有雙清集十卷紀行詩一卷弟桓字宗表永樂三年  
貢士金華衛經歷棄官歸隱有九峯一叟稿會上書當  
事請減浮糧文不具載

婁志

邵亨貞字復鵠祖桂子宋咸淳進士有別業在華亭娶曹



澤之女因家小蒸遂爲華亭人亨貞博通經史贍於文  
詞工眞草篆隸凡陰陽醫卜佛老之學盡究其奧與陶  
九成爲莫逆交自號見獨居士所著有蛾術集元末兵  
燹避地橫泖洪武初爲府學訓導卒年九十三子伯宣  
有學庵集古詩能世其業

陳志  
文學

王掖山陰人父逢避地海上因家焉洪武初爲通事司令  
轉翰林院博士與弟攝竝有詩名

梧溪  
集序

姜大順華亭人父廉洪武初以人材薦授武靖軍民判官  
長於詩有渚雨集大順仁孝性成母卒居廬三載頃刻  
不離墓側有司以孝義薦力辭沒後里人私謚安孝先

生夏寅銘其墓

郭志獨行

曹宗儒字元博華亭人慶孫子博學能文章洪武初任本  
邑教諭嘗以事受府委至京師上諭禮部曰教官所以  
作養生徒爲國儲才有司委以公務使不得盡心教訓  
甚非崇儒重道之意其禁止之所著有春秋左傳敘事  
本末三十卷子衡字士望精敏好學尤善眞行草書仕  
至工科給事中

郭志文苑

董紀字良史上海人父成字性存有詩名紀詞翰俱美凡  
賦詠一出輒膾炙人口洪武初以薦舉任江西按察僉  
事尋引病歸所著有西郊笑端集

顧志文學

周海華亭人父彥敬號正二元末張士誠據蘇彥敬爲其從事及明定三吳太祖以其從士誠也謫戍雲南海涕泣不食絕而復蘇乃瀝血上書乞以身代太祖嘉之從其請賜鐵券世襲楚雄衛百戶

族譜

沈易字翼之華亭人父德輝爲元提舉司平反冤獄百四十人易天資沈毅行篤孝友少求仕欲以功業見會時亂莫能遂且阻歸途乃游淇衛閒時廬陵碩儒權以制方以濂洛關閩之學客授河西易傾心事之盡闡宗旨客淇六年心未嘗斯須不在親側雖隆冬盛寒猶草席木榻或謂何自苦乃爾輒泣下潸然曰親在不獲養而

敢求自安邪後東歸就養家甚貧備極甘旨承顏婉愉  
視甚適焉洪武初下詔求賢郡守首薦以親老力辭繼  
又屢徵不出閉門授徒嘗取詩之有關倫理者彙爲五  
倫集并著周易旁訓等書卒年六十錢慶餘任季倫輩  
相與私謚苦節先生子二長度官翰林學士子孫世居  
郡城次榮官大理寺少卿子孫世居衛城北大石村竝  
有傳

顏敏字文敏號清隱上海人居崧澤里洪武初父仲睦坐  
法被逮論死子孫應戍邊敏年十三刺血上書白父冤  
太祖憫之得減放歸賜手詔旌其門子英延安同知以

考最得封敏如其官敏以國恩未報辭不受生平樂善  
好施斂區亂離中養生送死務盡其力人以孝稱年八  
十餘夫婦結草龕偕坐卻去人間事絕烟火食日惟飲  
酒勺許兩相傾對各談古今人盛德事成化中俱無疾  
而終徐獻忠傳其事

鄒志  
獨行

胡秉忠上海人洪武初舉人才知行唐縣事以禮教民製

孝順節義讀書三圖曰諭俗編以獻詔頒行天下

畿輔  
通志

范永亨名泰以字行父謨鄉貢進士元亨年集抄亂自湖

州四安山大村徙華亭隱居不仕永亨工詩文洪武中

與管訥等竝以文學爲官德安府照磨

高平敘  
傳略

陳傑字士傑華亭人居南橋有潛德好施予嘗構一軒小憩前臨平疇春夏秧歌四起秋冬收穫人行如在方罫閒因顏之曰閱耕練子寧方孝孺胡儼竝有記農圃自怡不入城市暇則藝竹栽花賦詩見志卒年七十七子禎自有傳

奉賢縣志

葉澈字清夫華亭人洪武初爲華陰令華陰當潼關之險爲陝右河南要衝時命將出師定巴蜀供億旣繁器械芻糧之輸於軍者取具邑四驛民大困澈度田而賦計丁而役又上封事陳利病上嘉其請以同州朝邑助之爲益還卒十傳卒十敕過賓毋許驛騷免迎勞費又白

府省令韓城白水郃陽澄城出車以給輓運築廬舍以庇來者華陰得少休流亡四集初纔二百戶後至一千三百戶以憂去民思不忘再起爲桂東尹

陳志賢達

許士顯字純德華亭人居竹岡拱武初以糧長輸粟京師憫賦役積弊久爲東南困慨然上書條列利害甚悉召對稱旨授開封府推官明年以卓異陞雲南布政司右參議時雲南峒蠻不靖黔國公沐英薦士顯才堪戎寄得旨報可以疾卒於途

奉賢志

黃黼字成章華亭人洪武中詔舉經明行修之士黼授樂

清教諭有懷東集

文翰類選

管訥字時敏華亭人九歲能文比壯儀觀偉然洪武中以秀才徵拜楚府紀善恭謹彊力事不避難楚王深加器重奏晉長史在職十年事無苟從年七十乞歸王不忍其去製詩慰留命世子書忠勤良佐四字褒異之奏留本國先是訥五十艱嗣及從討銅鼓蠻獻計畫悉破斬之諸將欲殄餘衆訥進言曰是雖荒裔亦人類也奈何草薶而禽獮之王從其言揮使蔡春退而歎曰管公一言活數萬之命必有後矣越數年生子錫名延枝養於宮中既長奏爲伴讀後遂爲楚人訥著有蚪蛟集延枝天順中年踰七十省墓還松親故有贈行詩文卷

陳志  
天達



袁宗彥名宗以字行洪武中官王府長史謫戍滇南有菊

莊集三卷

松風  
餘韻

殷奎字孝章一字孝伯華亭人後徙崑山少從楊維禎授  
春秋嘗應鄉試不利遂棄去洪武四年以薦赴京試高  
等例授州縣職因母老請近地便養忤上意責任陝西  
咸陽教諭在任四年訓士有法卒年四十六門人私謚  
文懿先生著有道學統緒圖家祭儀宦咸陽有咸陽志  
關中名勝集陝西圖經婁曲叢稿渭城寐語後徙家崑  
山輯崑山志

中吳紀聞  
郭志文苑

朱熙華亭人以詩名爲王峯顧仲瑛社長官廣西省郎中

袁海  
叟集

陸宗善字尙訥華亭人洪武中以碩學高行舉於鄉再令  
劇邑所至有惠政尤工詩書法亦清勁絕俗三衢金寔

亟稱之子顧言顧行並有詩名

顧志  
文學

朱芾字孟辨華亭人才思飄逸工詞章兼善翰墨真草篆

隸清潤遒勁風度不凡

顧志  
文學

顧祿字謹中華亭人洪武中爲太常典簿才藻監發能詩  
善書尤工分隸明初詩人袁凱而下卽稱謹中有過鄒  
陽湖詩云放歌今日容豪客破敵當年想至尊流傳禁  
中太祖命盡進其作一日解縉於便殿見覩上所常御

之處有祿詩數帙今集名經進以此

陳志文學

顧或字孔文以明經爲本邑訓導詩文豪整奇麗有古作者風學於王逢與錢蔭賴良以詩文雄於元季嘗顏其齋曰審安逢爲賦揭座右累官至戶部侍郎有客夜詩云露下碧梧白風生玉簾幽關河今夜客天地十年秋鼓角悲新鬼衣冠憶舊遊都將周顓淚灑徧黑貂裘著有上海縣志所傳柳枝詞今無全稿矣

上海志

吳哲字子愚華亭人博學善文辭尤以詩名嘗出佐戎幕歸教授於鄉至老不倦云

顧志文學

王應隆字嘉會華亭人邃於易理尤工詩文仕終國子司

業

郭志  
文苑

錢驥字子良上海人居漢成里以儒士舉任晉府紀善工

詩文所著名砥齋集

顧志  
文學

周彥才華亭人清慎有學喜吟詠有濯畦稿藏於家子冕

字子瞻號雪舫亦有詩名

郭志  
文苑

沈得四華亭人洪武十一年祖母張遘疾得四割股食之

卽愈久之祖父病得四又取肝作湯以進隨飲而瘳有

司上其事下詔旌之仍徵授太常寺贊禮郎其後有鈞

者少喪偶不娶人稱義夫有司旌之崇禎癸未進士泖

龍其後也

郭志  
獨行

全思誠字希賢博學能詩文仕本郡學正洪武十六年以  
耆儒徵授文華殿大學士兼左中允時年已九十餘辭  
不就帝曰以卿高德煩輔導太子耳免卿早朝從容侍  
對庶不負所學何辭焉明年思誠復請老乃敕曰卿懷  
才抱德志肩古人惜乎以衰老之年志雖存而力不逮  
朕不忍復勞令卿還鄉里以撫子孫享其奉養思誠詩  
學盛唐王逢輩俱尊之爲耆宿云卒祀鄉賢

上海志

陳禧字景道華亭人居南橋洪武中以太學生上書陳時  
弊語甚激切上怒命力士榜之不死謫戍雲南欣然就  
道聞者壯之禧弟禎稱國士當時布政袁季中贈詩云

阿兄自是瑚璉器廟堂之上宜先登一朝抗疏干天怒  
承恩遣戍雲南征蓋謂禎也

奉賢志

陳禎字景祺華亭人宋康肅公十四世孫也洪武中以稅  
戶子弟舉爲禮部主事有能聲上器之俾攝部事諭之  
曰卿見事敏四司之事宜悉知之禎益謹飭不敢怠坐  
齊麟事謫戍金齒未幾召還授五軍斷事丁家艱起復  
上疏乞終制服闋陞主客員外郎出知湖廣襄陽府時  
荆土旱蝗獨不入境永樂初爲鴻臚少卿治水吳中尋  
陞河南右參政黃河決禎招集流亡民得復業盜發汝  
寧將窺汴以計離其黨因盜首張子誠等於均山盡降

其衆賜救獎勞秩滿乞祭掃忤上意謫知交趾邱溫縣  
南方瘴癘時瘴暑或勸緩行曰死生命也何瘴癘爲至  
縣一月卒年五十上聞而惜之後八年其友胡士文請  
於掌交趾藩臬事尙書黃公福始獲以喪歸平居常曰  
人惟仰不愧俯不忤而已身之利否何計焉其行事類  
此弟裕字景容博雅工詞翰子謨詢誥諫

顧志  
名臣

王公亮華亭人洪武中以薦授吏科給事中陞應天府丞  
擢四川右布政使後調廣東公亮體貌豐偉儀度閒雅  
居官簡靜知大體所至有聲

顧志  
名臣

夏禮字公立上海人洪武中入太學官御史有直聲以疏

効勳貴忤旨出爲知縣奏減各處均輸商稅從之永樂  
初以薦復官御史陞河南按察副使謫戍武清文宗北  
巡召爲御史奉使至南京值牘壩水溢漂民居亟令有  
司疏洩上聞而是之復以薦爲陝西按察副使積歲疑  
獄片言而決以內艱去陝西數千人詣闕請留還任卒

於官

顧志  
名臣

李至剛名銅以字行父象賢見流寓至剛少從楊維禎游  
爲詩文有清思洪武二十一年舉明經選侍懿文太子  
授禮部郎中坐累謫戍尋召爲工部郎中遷河南右參  
議河決汴隄至剛議借王府積木作筏濟之建文中調



湖廣左參議坐事繫獄成祖卽位左右稱其才遂以爲  
右通政與修太祖實錄朝夕侍左右稱說洪武中故事  
甚見親信尋進禮部尙書首發建都北平議請禁言事  
者挾私皆從之尋兼左春坊大學士直東宮講筵已復  
坐事降禮部郎中解縉下獄詞連至剛亦坐繫十餘年  
仁宗卽位得釋復以爲左通政爲給事中梁盛所劾出  
知興化府子源字士徵永樂二十二年進士官至陝西  
參政源分守金華時閩賊起婺處間率二子楷概及家  
人悉出行陳擒斬甚衆爲御史李俊中傷被黜賊平復  
官孫桓正統九年舉人官處州府知府有惠政

明史參  
修分省

人物  
考

任勉之字近思其先自四明徙居華亭父繼祖清約敦行  
誼嘗識蕭山魏文靖於少年中許爲公輔器勉之登洪  
武二十七年進士授饒州鄱陽令鄱故大邑事繁劇勉  
之立簿書俾民自爲約次第舉行又訪擇其鄉之有德  
學者爲四門老每事相與酌輕重處之或黏匿名書於  
縣門勉之曰是教我也令勿壞有寡婦訴夫兄不爲養  
勉之曰汝欲他適乎乃判其衫背曰餓死事極小失節  
事極大婦感其言卒不嫁秩滿陞知瀘州鄱民詣闕請  
留陞其府同知薦爲福建右參政左遷右軍都督府經

歷出知徽州府以事謫滄州尋起知蔚州改睢州致仕  
卒年八十九勉之豪邁英偉長身玉立音如洪鐘雖造  
次語皆可錄太祖嘗遣使廉察諸仕宦家至勉之第止  
茅屋三間門臨池水父灌園母紡績使者問門庭何蕭  
索如是父答曰吾令兒子作清官不欲以脂膏自潤耳  
使者陳其狀帝嘉歎旌異之著有薇庵集子肅早天以  
弟子宏爲後孫順國子助教陞涇府右長史

通志參顧  
志名臣

俞允字嘉言華亭人後改名永力耕事父登洪武二十七  
年進士授行人補楚府紀善輔導有體尋宰魯山創明  
理學士風翕然永樂初敕修大典召授禮部主事與胡

嚴劉李篋楊溥同在史局丁外艱服闋復官儀制司以  
婚典奉旨往督供張誤期謫判長沙尋致政歸又七年  
卒允爲方正學孝孺門人當正學被難有幼子德宗航  
海投允允收匿舍中冒俞姓以養女妻之宗人懼禍更  
姓余事具德宗傳萬厯己酉提學御史楊廷筠廉其事  
得復原姓建祠祀正學而以允配焉

郭志

夏長文上海人洪武中以人材舉拜監察御史劾左都御

史袁泰違法陞左僉都御史

上海志

錢惟慶字汝明華亭人吳越武肅王裔七歲喪父執禮如  
成人母孝部符賦民銅急遣使捕後期者其兄存善

與焉兄弟詣使者爭行使者感泣宥免故居爲里人所  
奪不能復後其人蹈危禍或勸之申理惟慶曰乘人之  
危不仁竟已之子溥博自有傳

雲間人物志

張榮一華亭人洪武十九年母楊氏病劇榮一禱天剖腹  
取肝以進母啖之卽愈里人以其事聞詔旌其門繪像  
城隍廟中至今尙存

顧志孝友

陸文旺號德林上海人三歲能識心斗二宿見者驚歎長  
好讀書篤於孝友里有就文旺質成者誨以大義咸感  
悟去楊苗之亂流寓苕溪人指其故處而言曰此陸德  
林先生居也相戒勿毀卒年八十有九五世孫鏗以資

雄里中好施予東鄉地瘠易旱捐資開濬人賴其利稱

東臯翁子孫至今繁衍云

郭志獨行

張桓字宗武華亭人母病劇焚香籲天潛割股以進母食之愈事兄宗文盡恭愛有司命董里中輸賦貧不能輸者代之輸不責償歲饑出穀貸匱乏久率歸其券葺鄉校及祀典祠又作義井橋梁渡舟製方藥濟疾疢洪武中以稅戶徵例當除官固辭永樂壬辰復徵除元氏縣主簿廉勤得民心後以進賀牋詣京師行次沙河水暴漲覆舟人皆溺死桓漂流四十餘里若有人舉之者及其僕馬皆獲濟人以爲好善之應子二暉暉楊文貞士

奇志其墓

郭志獨行

王忠上海人洪武中以人材薦授永春縣知縣性聰敏勤於吏事蠲稅糧均徭役嘗奏革額辦緞匹民至今德之

陳志賢達

張年字公壽元季由鴛湖避兵海上因家焉父綸爲太醫洪武中嘗以事被逮年徒跣詣闕冒死陳狀卒白父冤後以醫徵不就永樂中廷臣薦其才下詔徵聘年復固辭時人高其雅尙爲詩文工而有法所居白沙鄉舍旁隙地種杏成林人稱杏園先生著有杏園稿

上海縣志

穆良華亭人建文元年領鄉薦授太原府訓導俗朴魯不

尙文藝良隨時獎勸學子日益同郡姜以禮俞嘉言欲  
具疏薦之良力謝乃止後爲霸州蕭山教諭一以士習  
人心爲本歷官三十年自奉清約語及勢利輒蹙額曰  
利以和義若罔上浚下害不及身必其子孫人皆服其  
言年踰八十卒

通志

石璞華亭人建文元年領鄉薦任陝西按察使剖決如流  
吏民畏服得憲臣體

顧志名臣

張大年華亭人以俠聞建文四年太常寺卿黃子澄亡至  
蘇州捕甚急子澄過沙河或言宜執獻富貴可立致大  
年曰如此富貴吾何愛焉已被執株連甚衆大年亦被



仇誣以黃黨繫獄久且病子潛稱冤闕下奏凡十八上

遮臺官馬泣訴得入侍父療疾大年竟得宥還

五茸志逸

王守信字蕉雪布衣授徒自給聞燕師入京絕食死

劉仲禮字用和上海人以明經辟召至應天遇燕師入不

食七日死孫銑鈍永樂閒銑以會計事坐法當械赴京

鈍婚二日卽趣裝護行後兄思歸鈍陰乞守者以已代

之兄歸給父母謂弟病道卒父母悲哀不已會刑部訪

善字書者獄吏以鈍聞試之稱善爲釋其罪而禮遣焉

比至家相驚爲鬼鈍具告其故與父母對泣兄媿自內

逸去鈍亦不明兄之給已也鈍子璵官至建寧知府

歸太

集文

王鐘字公簾華亭人洪武中爲掾史坐事戍遼東以薦授  
行太僕寺典簿進燕府紀善燕師南向鐘侍世子守北  
平恭愼小心夙夜不懈甚爲世子所重永樂元年陞北  
京刑部郎中戶部右侍郎鐘爲人端厚沈靜從容詳雅  
事無留滯僚吏多服其能七年卒洪熙元年以眷念舊  
勞贈太子太保諡僖敏

顧志名臣

張淵華亭人永樂初知泰寧縣侑儻廉潔勤於撫字邑自  
元季以來學宮廢弛淵銳意作興多所造就民有訟者  
必從容開諭使自悟去祀邵武名宦

陳志賢達

張賓賜名昕以字行裔出宋宰相商英後先世自杭徙華亭賓賜少穎悟孫大雅王叔明一見異之永樂初尙書夏原吉治水吳松舉賓賜自輔建議疏范家浜與葉宗行計合原吉從之薦授戶部主事陞員外郎通政趙居任治水浙西爲政繁擾民苦之仁宗監國命賓賜爲副時已七月居任猶役民晝夜戽水不息賓賜言農事今已不及徒勞無益卽日散遣之民皆感悅家素豐在官不受俸錢旣致仕家居以周卹爲事鄉人稱之

顧志名臣

翁煥文華亭人永樂三年任平陽縣主簿公正而明敏吏

不敢欺民安其治

浙江通志

沈度字民則弟粲字民望皆易子也兄弟俱善書度以婉麗勝粲以遒逸勝各臻其妙度文章尙平淡絕去浮靡洪武中舉文學弗就坐累謫雲南岷王具禮幣聘之未幾辭去都督瞿能延之教子弟遂與偕入京師時文皇卽位詔吏部簡能書者入翰林給廩祿度與焉其書爲帝所賞凡金版玉策用之廟廷及藏祕府頒屬國必命之書由翰林典籍擢檢討歷遷侍講學士粲自翰林待詔遷中書舍人擢侍讀進大理寺少卿兄弟並賜織金衣鏤姓名於象簡泥之以金恩遇最隆時稱大小學士云度子藻亦善書以廕爲中書舍人陞禮部員外致仕

孝宗尤好度書訪其後得四世孫世隆卽授中書舍人  
直內閣正德中與修國史以事去官卒

張政字彥功華亭人永樂九年舉人知遂安縣召爲御史  
出巡遼東過郵亭將止宿驛吏以妖告政不聽更深果  
有萬馬馳驟聲政疑庭下古木爲祟悉令伐之妖遂息  
丁外艱免喪廷臣薦廉能御史十七人分巡天下政與  
焉陞江西僉憲以母老陳情不報動輒流涕疾作至廣  
陵卒臨終無他言惟以忠孝勉子孫而已

陳志  
賢達

黃翰字汝申華亭人永樂十年進士授江西按察僉事宣  
德庚戌陞參議奉璽書與都御史賈諒巡撫江西改參

廣東陞山東按察使罷歸卒翰爲人豪雋多權略始冠擢第觀政都察院有疑獄一問卽決讞辭如老吏臺中皆驚居官所至能舉職江西人以妖術惑衆廣東畜蠱毒采生殺人皆捕誅之仍刻石著蠱毒方及所以解之者自是術不得行俗爲一變然負其才氣不能就矩矱旣失官家居頗自恣常乘白羴入城市見者皆斂避焉詩文豪健敏捷操筆立就未嘗起草字畫亦遒勁行草

題署得名

顧志名臣

王端字汝善華亭人永樂十五年領鄉薦宣德二年中會試副榜官淳安教諭識商文毅輅於諸生中歷官汀州

教授以老乞歸端有學行詩詞清麗尤明法律爲時推

重

妻志

張辰字翰宸號端居嘗署嘉定教官以詩名與錢士修輩

爲松江二十一詩人

文翰類選參巖山集四友齋叢說

張衡字允平上海人登永樂十三年進士宣德間授監察

御史上澄清風紀疏謫戍遼東卒於戍所嘗遺書於孫

穀曰本以名義經心不顧利害日望汝成立慰我冥冥

其節操詳見吳文定寬陸文裕深贊

上海志

楊珙字廷瑞上海人凝重穎敏讀書過目成誦永樂十五年以第一人舉於鄉明年成進士授翰林院編修久之

以疾歸卒珙性至孝以祖德亨從宦葬陝州之靈寶百方規畫卒返其柩於鄉祖母蔡臨終遺言用浮屠法火葬珙曰非治命也卒棺斂如禮無子高博其外孫

上海志參

郭志名臣

陳詢字汝同華亭人永樂十六年進士選翰林院庶吉士以才氣自負久不得遷時同鄉沈度爲學士諷詢蓋少自貶詢不然之太宗聞嘉其剛直擢編修侍皇太孫宣德中陞修撰時經筵初啟詢爲講官纂修宣宗實錄成陞侍讀秩滿陞侍講學士中官王振方用事公卿多下之劉大夏李賢以忤得奇禍詢絕不與通振銜之出爲



安陸州知州召爲大理寺少卿巡撫大名諸府景泰初改太常寺少卿兼翰林院侍講學士經筵講官尋改國子監祭酒天順二年致仕卒於家命有司致祭詢性峭直寡言笑飲酒能多而不亂在官處僚友和而不同人不敢干以私秉道疾邪蓋出天性編修梁譔病語家人曰朋游中惟陳汝同可託子女詢聞而諾焉及譔卒爲經紀其家事無不曲盡至冒謗毀而爲之不恤嫁其女得松人黃瑜後爲福建參政竟以梁之喪歸其鄉其篤於友誼如此爲文章清勁有氣骨類其爲人主考兩畿判國子獎拔士類甚衆若嚴銓邱濬楊繼宗彭韶施槃

輩後皆爲名臣

顧志名臣

馮敬華亭人永樂十六年進士官給事中擢授高州府知

府公廉仁恕興學禮賢設社學誨民閒子弟秩滿士民

乞留不許頌民思之

陳志賢達

黃恭字孟莊上海人永樂十八年舉於鄉正統中以刑曹

郎出知贛州有惠政以憂去贛民如失父母服除補黎

平崇尚實政惠治小民時苗匪不靖偏近郡城恭招募

丁壯豫儲糧糗定計討賊遂平之招集流亡出俸賑饑

全活數十萬人以功食三品俸九載卒於官子彥宏博

學儻有父風

貴州通志

衛青華亭人居蕭塘父炳當元季應募隸水軍萬戶府太祖受命杖劍來歸數從征討未嘗妄殺一人有功輒讓同列以故終行伍未顯名青狀貌雄偉偶儻有氣槩勇而善謀洪武末以總旗授薊州衛百戶累陞山東都指揮僉事備倭海上永樂中蒲臺妖婦唐賽兒自稱佛母誘愚民爲亂攻安邱甚急青聞率千騎晝夜兼行至城下擊破之殺二千餘人生擒四千人時城中已不支衆謂青至稍緩城必陷已而安遠侯柳升至怒其不待已捽辱之青不爲屈事聞上切責升降赦褒美曰衛青進不求名退不避罪惟民是保雖古名將何以加焉陞都

指揮使正統初進右軍都督僉事仍備倭六月以旱蝗  
出禱得疾上聞遣醫療之未至二日卒葬濟南歷城之  
雒華鄉青幼時牧羊馬嶠寺前有道士見而奇之撫其  
頂曰兒他日腰金衣紫聞者皆笑至是果然及卒登萊  
人爲立廟海上祀之甚嚴或見其絳袍白馬出入廟中  
云有子十一人長頤襲濟南衛指揮使早卒無子次頤  
嗣以功封宣城伯餘分處濟南登萊留華亭者行第九  
曰顯云

陳志  
賢達

孫豫華亭人永樂十八年以人材薦特授山西右布政使

歷官省轄以清節著

錢浩字宗海華亭人永樂二十一年鄉試第一宣德戊申  
分教崇德沈粲知其才薦知山陰浩豈弟文雅抑豪強  
伸枉滯斷獄平反里胥應役有程度邑庠陞監買地更  
新之入覲不納纖毫賂黷聲名籍甚以誼逮落職歸杜  
門陶情詩酒不以窮達加損山陰人多去後思

陳志賢  
達參紹

興名  
宦傳

陳質字文彬上海人永樂二十二年進士拜御史風操凜  
然論事斷獄雖權貴莫敢屈嘗從靖遠伯王驥統兵勦  
苗洞參與軍謀陞任山東參政居官四十年清謹如一  
日致仕家居杜門卻輒親舊不敢干以私卒年七十五

陳志  
賢達

俞本字立初華亭人永樂二十二年進士景泰中由御史  
任山東按察使墨吏望風解印綬去才賢爭自濯磨無  
敢爲非法風紀凜然稱一時之冠

陳志  
賢達

許進上海人永樂中官韶州府同知甫蒞任捐俸倡修學  
校除害興利撫字其民開國以來佐郡者以進爲最

通志

王琬華亭人以楷書起家除北通州知州有惠政成祖北  
伐撤民閒門扉渡軍及凱還扣馬爲民請償上義之弗

責也

陳志  
賢達

焦伯訥華亭人居皇甫林潔身修行奉母至孝治經悉通  
奧義尤長於書鄉會試聘典文衡俱辭疾不赴隱居教  
授及門多達者著有慎齋集

顧志  
文舉

馬麟華亭人永樂中以人材薦特授布政使居官二十年

民安之正統九年以老病乞致仕卒

郭志  
名臣

葉宗行名宗人以字行華亭人宋太學生李後讀書尚氣  
節永樂中東吳大水松江以黃浦壅塞水無所歸被害  
尤甚上書請棄故道濬范家浜引浦水以歸於海禁瀕  
海居民無得私築壩堰以遏其流上善其言命從夏尙  
書原吉來相度治水功成患息原吉還朝薦其才擢知

錢塘縣錢塘劇邑民困於徭賦中行爲定役法俾民自  
占甲乙書於冊循次而召之役遂以均訟亦衰息不踰  
年翕然稱治一日廳事前有蛇蜿蜒若有所訴中行諭  
之曰若豈有冤乎吾爲汝驗之蛇返入餅肆中墮下積  
之得死尸乃肆主人利其財殺之坎瘞此遂伏誅又嘗  
江行忽舟重不能進視之一死人挂於柁腰下有石乃  
里中人殺而沈之者亦伏誅縣故多虎暴中行爲文祭  
之虎遂斂迹仁宗在東宮聞其治行戒所司不得撻辱  
按察使周新風采巖峻尤重之嘗候中行出嚮至其舍  
視廚中惟笠澤銀魚乾一裹新歎息攜少許去明日召



以食曰此君家物也飲之至醉出三品饌仗導之歸中行辭不許曰此位可至奚辭爲時呼爲錢塘一葉清會朝廷有營建事中行率兩浙工匠赴北京道病卒新館懷累曰爲文以祭錢塘人至今稱之謂不愧古循吏云

顧志名臣

王彥文號益齋爲府學訓導陞嘉興知縣舉修永樂大典領詩經副總裁所著有詩傳旁通行世

其志

夏文字宗文號醉漁世家華亭從張夢辰習詩律有奇聲永樂閒以繕書被召與修永樂大典事竣授廣平府著

有長淮醉漁稿

楊文敏集

金鉉字文鼎華亭人居七寶有孝行茹精蹈潔當路欲薦之以親老固辭喜吟詠書畫皆擅長時稱三絕以子鈍

貴封中書舍人所著有鳳城稿尚素齋集

郭志文苑

謝士南華亭人幼穎悟日記萬言博綜經術尤精於春秋

舉任本邑訓導陞口口敎諭卒

顧志文舉

范鼎字文鉉華亭人善屬文精書法以薦興修太祖實錄書成將授以官固辭歸授徒里中從游甚衆學者稱爲

桂樓先生年七十餘卒

黃志

朱木字楚材上海人治易工辭章所著有靜翁集靜軒行稿子元振字壽梅隱居自樂詩有紆回神澹之致

上海志

何廣字公遠華亭人後徙上海以明經爲江西令擢御史  
累遷陝西按察副使博學有才尤精法律時變亂成法  
者當大辟法家因仍凡一政令改易輒以傳譴廣曰若  
是則大辟者雖相接矣此但爲改定律令者言之益禁  
於所不犯也學士解縉深然之及卒長沙通判俞永狀  
其行曰居鄉里則稱學者任郡邑則爲循吏在風憲有  
澄清志位藩垣得大臣體時以爲實錄所著有律解辨  
疑行於世

上海志

陸潤玉號夢庵華亭人居北郭博學好古不妄言動工於  
吟詠與夏璿張遜王桓陳鵬彭思禮郭用常輩結爲詩

社相唱和有夢庵集行於時

顧志文學

王桓字公玉華亭人壯歲游京師從翰林張廷璧太常夏仲昭蕭山魏仲房學詩注意措詞不苟蹈襲仲房亟稱許之謂其如雲游碧落水返滄溟又謂如月麗丹青花明紫禁當時以爲知言桓自號雪航著有雪航集

郭志文苑

李伯璵字君美上海人宣德元年領鄉薦歷桐廬山陰訓導秀水安福教諭其誨人一以道義諸生貧而好學者衣食之其不率教雖束脩之饋不受桐廬累舉缺人伯璵至識姚文敏公夔於少年曰一夔足矣授以春秋未幾擢第山陰學或傳不利科目請徙之伯璵曰顧師弟

子教學何如耳卒不徙後仕者相繼陞淮府長史從王入覲左右請他求伯璵不可曰君臣之間有賜無求求則瀆瀆則不敬淮府使人入貢道與一縣令構爭詔下令於獄而釋使者不問伯璵請治之以戒生事官校有犯王械寘於市伯璵請論如律以全其生王有疾左右請施僧祈福伯璵謂不若貸丁役錢以蘇衛士從之卒年六十八著有文翰類選一百六十三卷行世子澄清竝登進士澄字希范終福建左參議恬靜有守不競榮利有古人風清別有傳第八子深字希堽少有雋才讀書通音律淮王愛之具疏納爲儀賓太后特召入京厚

賁賜婚異數也

陳志  
賢達

蔣性中字用和上海人宣德二年進士登第告歸有司舉故事爲立表於門時邢竇湖病涉久性中曰榮吾家曷若以惠吾鄉乎卽移所費爲石梁於湖上往來便之除兵科給事中議節冗食養驍勇陞江西參議論蠲賦當均一方不當私一邑時皆從之以疾乞致仕章四上乃許性中幼端慤旣擢第家居常躬耕以養母杜門卻婦不以私干人周文襄巡撫江南深相器重至老益恭慎檢身治家恆若不及時稱爲篤行君子云

上海志

張能字以能華亭人幼好學博涉經史宣德間郡守黃子

威聞其名辟爲吏能侃然以直道自持郡政或失必與  
守力爭時有數十人坐誣守當以死法能廉知其冤白  
之得免嘗謂獄者死生所係尤宜盡心恆躬自軫視卹  
其飢寒獄囚無橫死者同事者忌之屢構謠詠恬然不  
校後皆翕服久之奏最入都從事張英公幕下其行已  
涖事益謹英公加禮焉三載授冠帶謝病歸買宅於郡  
城之南顏其堂曰樂善謂其子祚曰吾欲効用明時而  
屈於資格汝當自勉以成吾志生平篤於孝友待兄之  
孤子如已子好善嫉惡無少回隱性樂施與周卹窮賈  
無閒疏戚卒年六十一

林鍾華亭人有學行通詩書春秋三經宣德中任崑山訓導入侍經筵擢知慈利縣蒞政廉明邊夷向慕作喪禮榜諭民間有裨風化歷官山東參政著松谷集

陳志賢達

張瑀字端玉其先揚州人隨宋南渡徙華亭居郡南城瑀自幼刻志問學宣德八年以進士乙榜授山東黃縣學訓導躬踐履以率之黃士成名者甚衆陞淮府紀善以子瑩貴封監察御史進都察院右副都御史卒贈太子少保刑部尚書瑀事親孝居喪盡禮蔬食者六年所居近墓旦夕常至墓所拜跪涕泣聞者感動家居二十年非公事不入城府瑩按察江西拔安福令於冤獄令以



銀三百兩託鄉人爲璫壽璫不受士論高之

順志名臣

郭綸字用言華亭人魏文靖分教時推重之宣德十年以第一人舉於鄉署應城教諭應城缺舉已十二科綸署教兩科獲雋者六人陞日照令在任四載不忍以智術愚民唯以厚本敦俗爲務暇則進諸生講授士悅民安卒於官從祀上蔡先生祠

陳志賢達參  
湖廣通志

張倫字文簡華亭人居七寶鎮以氣槩自雄好讀左氏春秋及歷代史傳尙志節有古俠烈風宣德中郡丞馬奉檄運稅糧十萬斛赴徐州監收內官拒弗納丞惶遽無策倫時隨行儒服入見曰人謂平江伯無善謀果然今

統十萬人治河撩淺淺如故若以十萬人築城浚河擴倉廩以接南運待水發運京末爲不可今以十萬糧委之荒野設遇兵變非以資敵邪監收者懼納之倉其懔慨抵掌談言微中能使人傾聽如此先是周文襄巡撫江南病征輸無法倫獻策立水次倉民以爲便倫在文襄幕府垂二十載文襄欲以葉中行例薦不應暮年家居憫吳松蒲匯淤塞歲比不登上書請疏濬知府聘倫經紀其事以通潮汐家美園池竹木人稱爲園上張云

子齡舉鄉薦

上海志

朱瑄字廷珍華亭人正統三年領鄉薦當赴禮闈適其父

從盧龍戍所歸瑄曰吾以不得侍親爲恨奈何復遠游  
乎竟不赴十三年登進士授御史巡按應天太平令某  
與中貴姻連怙勢爲虐瑄按以法擢山西僉憲有中貴  
親幸者入其境會大雪欲射獵爲樂瑄曰軍士凍餒必  
有死者況道滑不便馳逐獨不自愛乎遂止遷副使致  
仕年八十三卒

陳志  
賢達

姜清字克澄華亭人廬陵孫公鼎教授松江時門下有十  
才子清與周興爲之冠正統三年鄉舉任臨潼教諭卒  
清持己方嚴訓士有範臨潼人力學知奮焉載陝西名  
宦七世孫雲龍萬歷丁酉舉人官內閣中書舍人

郭志  
文苑

錢溥字原溥華亭人正統四年進士試齋薇露詩稱旨授檢討歷南京吏部尙書卒年八十一賜祭葬諡文通溥少知名嘗上書楊士奇論學士奇題之又與巡撫周忱論便民條約復移書侍郎李某論積荒召佃煎鹽水次倉四事多見施行前後五典文衡號得士當奉使安南時與禮部論移文不當與內臣同行禮又與內臣書論詔敕閱讀先後之序至安南與王論郊迎禮儀王悉從之時以爲得體弟博字原博正統六年應天解元十年成進士授南京刑部主事獄疫博手自調藥治之囚多全活歷官四川按察使溥長子岡字景高博學好古尤

詳松郡掌故博孫啟宏宏治六年進士官刑部主事統

志參修  
明史稿

徐觀字尚賓華亭人工詞翰正統六年舉於鄉游國學才  
名益著交南朝鮮諸國使者至購其書以爲榮授武選  
司主事日坐廳事鈎稽曹務酬應響答暇則賦詩瀟翰  
以縑素求者旁午同官歎曰尚賓形如老鶴才如湧泉  
不可及也告歸其父竹庭尙無恙日以潔養爲事益購  
文籍法書名畫及鼎彝古器自娛而已

郭志  
文苑

侯盡字進忠華亭人正統六年領鄉薦景泰中試吏部尙  
書王文端公奇其文擢置第一授襄陽府同知改處州

屬邑龍泉慶元民盜礦阻山爲亂中官盧永議發兵勦之雖言人貧竊礦爲亂非其本心卽躬詣其地諭以禍福民感激散去全活者甚衆陞河東鹽運同知鹽池故無垣亡賴子衆衆殺劫有司莫能制盡條陳禁革疏通十餘策得旨報可行之盜賊屏息天雨鹽池溢盡致齋三日遂霽而池外十餘里雨如故人以爲誠感子方直皆第進士方字公矩有文名終湖廣僉事直廣西參議

順志  
名臣

孟陽字文昱華亭人正統六年領鄉薦入胥監尋拜御史時山左告警人心集嚴陽奉命巡按所至撫循煦諭四

境以安鉏貪暴決疑獄風教凜整卒於京錢文通志其

墓

陳志  
賢達

薛驥字元德華亭人正統六年舉於鄉成化二年謫襄陵縣知縣先官御史稱敢言及知縣事慈祥愷悌以簡易

著卒以不附權貴解組歸祀名宦

山西  
通志

曹安字以寧華亭人正統九年舉於鄉任鄆陵訓導陞武

邑教諭博學能文章揮豪立就居恆不廢撰著所作文

曰取嗤稿詩曰蟋蟀吟皆不傳獨調語長語行世

郭志  
文苑

朱璩字克純華亭人居蕭塘少游京師從婦翁吏部郎俞

宗大學楷書已從翰林曾鶴齡學舉業正統十年成進

士拜御史數言事都御史王文讓之故事御史有疏皆請印於其長璆嘗以疏請印文迎笑曰君復有言邪視之乃劾已疏大怒抗章自辯且深詆璆謫安福典史天順初文誅起知大庾縣調新淦未幾謝病歸自治園圃多種佳菊更號菊存在籍數年卒璆以御史居家有牛嘗蹊柳氏田柳格殺牛遣狂子醉罵良久墮水中璆使人援出之易己衣迎置上坐呼牧牛兒鞭之使人以肩輿送柳氏子歸時稱長者

陳志賢達

張鑒字廷器華亭人父瑀鑒正統十三年進士景泰初授監察御史密雲有謫言不軌者鑒受命往撫之成化三



年以右副都御史巡撫寧夏城土築鑿甃以甌道河流  
溉靈州屯田七百餘頃官至南京兵部尚書贈太保諡  
莊懿鑒性寬簡所歷能舉其職居喪旦夕饋奠必親執  
已跪而哭至徹乃已終三年無少變與弟壘友愛深至  
終身無閒言

墓志

夏寅字時正後改字正夫華亭人幼而岐嶷日記數百言  
稍長益肆力於學正統十三年進士景泰初除南京吏  
部主事日取羣經及百家言讀之久之發爲文章淵閎  
奧密脫去流俗自成一機杼聲稱蔚然由稽勳郎中拜  
江西按察副使專董學政其敏以崇實學黜浮華爲本

復文山祠葺白鹿書院修陶侃讀書臺以風厲後學陞  
浙江右參政處州民有苦虐政走聚山谷者招之不聽  
曰須夏參政來乃可寅檄至卽散進山東右布政卒年  
六十六寅平居以諸葛武侯范文正自期待嘗疏論國  
家之勢在離合合則安離則危今兩京竝建其勢宜常  
合以制天下徐州地連山東饑饉宜賑卹臨清乃南北  
咽喉或暫梗爲害不小宜選大臣有望實者鎮守訓兵  
屯田示天下形勢廷議出白金四萬兩賑徐州命都御  
史賈俊鎮臨清吳中歲旱寅致書巡撫發廩二十萬石  
糴十萬石民獲濟他所論列若文廟禮樂之數正風俗

立紀綱作人材之類雖不盡用識者韙之爲郎二十年  
爲副使十六年未嘗以淹屈降志嘗謂人有三可惜此  
身不學可惜此日閒曠可惜此身一敗可惜世以爲名  
言所著有紀行集東游錄史詠等竝行於時

陳志賢達

莫文通華亭人歲暮自館歸日初昏渡浦有兩人縛少女  
至問故曰此女爲父母所疑命投之水文通以袖中修  
資十金與之曰汝得吾金而又活一命此兩利也何如  
諾之女欲從莫莫曰若是則我貪汝色也引女近村使  
望燈火而趨乃各去女爲一生所收文通歸而室人有  
身明年生子昊後登賢書昊子如忠成進士

南吳舊話

張璞字廷采華亭人居七寶博覽書籍無所不究工詩善書而尤邃於易正統中以府學生貢入胄監授陳州學正著有易髓一卷及淮陽志若干卷

集志

姚有德金山衛前所人身長七尺五寸能左右射年十九以戰功授圖山把總其父惑後妻言苛求無已闔帥欲召而訓之有德請日子未盡孝先貽父以不慈名是重有德罪也帥曰吾不忍若也有德知帥意未釋出倚柱哭夜分不輟繼母聞而悔使人迎歸歡愛無閒帥亦不之問江營餉銀被劫逮有德於獄鄱陽盜遺書土賊曰奈何劫孝子汎地速宜歸之一夕土賊以餉銀并盜書

委諸江上爲營兵得之告主者釋有德正統初操江某薦陞霸州遊擊英宗北征命有德侍衛御營及土木軍覆有德以身蔽上飛矢集顙大呼曰不能報天恩矣冒刃苦戰馬蹶被縛不屈死也先焚其尸得箭鏃數升也

先曰中國亦有此人耶

華亭志

李年字成之華亭人自號一枵子性沈靜簡默好讀書肆力先秦兩漢文與諸生講解懇懇詳辨冀其有得而後已少應童子試學使者令科跣入年恥之遂終身不再試英宗北狩年適鋤於圃聞之涕泣彌日卒之日學者私謚貞靖先生錢溥有議

冀志

朱允字克信上海人居沈莊景泰元年舉於鄉官連州牧  
秉心清白興利除害論者方之劉禹錫以征蠻功陞平  
樂府知府有政聲善吟詠著牧民集

南匯志

周輿字廷參華亭人少恬靜刻志問學尤精於史終卷默  
誦不遺正統十二年薦解南畿景泰二年登進士授翰  
林院編修丁內艱廬居三年足迹不入城府年四十六  
卒子佩字鳴玉宏治三年進士授都水司主事歷官刑  
部郎中太監劉瑾專政佩卽疏歸家居二十五年卒年  
八十五性孝友詩文典雅有法

費志

唐瑜字廷美上海人九歲失恃事繼母如所生景泰二年

登進士授南京禮科給事中京城饑分地給食活者甚衆出知衢州尙德緩刑民不忍欺縣有孔氏祭田奪於民瑜以私財贖其租使供祀事孔氏子孫圖瑜像於家廟生饗之癸未旱疫爲文禱於神雨大作後數旱禱輒雨民勒石紀其事李延者爲媒蝕聘金鬻二子以償不足又市其妻瑜聞而歎曰民窮而犯法畏法而棄妻子典守者過也贖還之龍游張福戕吳氏四人而誣其事於金氏旣誣服矣瑜別置於獄廉得之釋金而罪福民以爲神遷湖廣參政山西雲南布政使進副都御史巡撫甘肅詔使諷織絁絨以充貢獻瑜執弗從武臣有被

黜者復爲中傷坐劾以去宏治壬子復故官致仕卒繼  
人相率遠至哭奠數月不絕

上海志

袁愷字舜舉其先安邱人占籍華亭愷少貧習商賈二十  
七始讀書景泰二年登進士授刑部主事陞江西僉事  
改廣東所至有聲江西賊圍西貴縣長州村愷率兵討  
捕時賊勢方熾或請宜少退愷下馬叱使進攻克之巡  
撫葉文莊知其才委調狼山兵不敢肆又率偏師駐全  
州督軍餉贊畫梧州總府多所裨益都御史韓雍征大  
藤峽愷擐甲從征所向克捷事平擢廣東按察使進右  
布政使遷雲南左布政使未至卒愷廉慎勤職居官三



十年家無餘財居鄉出入乘小舟從一蒼頭見者不知其爲貴官也子珮孫讚皆以能書授中書舍人

陳志賢達

沈瑜字廷美上海人成化初以舉人與修英廟實錄授中書舍人遷尙寶司永宏治三年遷少卿四年陞南京太常寺少卿十四年卒賜祭如例瑜美姿容善談論文藝政事有可稱者以重聽故不獲擢用云

郭志名臣

葉萱字廷茂華亭人景泰五年進士除兵部主事晉郎中爲會試同考官稱得士奉敕調軍安插邊境軍人久處內地樂宴安憚徭役萱奏免老弱者陞河南右參議時土軍爲民害萱嚴捕之置於法改福建右參議上疏釋

銀礦貢頴歷官江西布政使引年歸讓產於兄弟築室

城西居之著有春秋義可庵稿若干卷

妻志

邵文博以字行上海人景泰五年進士授御史有直聲歷陞湖廣按察副使撫蠻寇活三十萬衆居官清介一錢尺帛不妄取妻子衣敝緇飯脫粟處之晏如嘗有老蒼頭夜侍忽從旁泣而言曰主公寧能常在官中乎家計日落奈何不爲子孫地也文博艷然怒曰余如貞婦苦守幾垂白矣爾欲汗我令我子孫不得爲清白吏子孫邪以儿抵之其大節類此

上海志

張曉字茂蘭華亭人景泰五年進士除南京刑部主事陞

四川僉事時蜀盜充斥晚出入戎馬勦撫悉合機宜渠  
魁援首又仙泉永通竈丁五千餘盜官鹽吏不可禁衆  
議出兵擊之晚曰兵事甫定若更激之小則退依山谷  
大則抵禦官軍乃單騎至盜所諭之曰汝等盜官物法  
當贖在爲首者自詣理訴耳渠首果出餘悉杖遣之衆  
感更生後分守建昌等六衛清糧餉舊額奪於豪右者  
悉復之番人刺助賢刺馬能兄弟最桀黠抗不出聞晚  
威名俱至數十年讐殺悉聽辨理漸復華風晚有軍功  
輒不上曰行陳之士出死力吾儕忍分其功公論尤偉  
之後忤執政意致政歸卒於家

陳志  
賢達

王績字公偉華亭人景泰五年進士授行人歷官常德府知府持身清介人不敢干以私歲大旱竭誠祈禱親詣龍門洞引繩而下必窮其處天大雨士民感悅以考滿卒於途囊無餘貲妻子不能還同知胡琮及士民相與厚賻之

陳志賢達  
湖南通志

吳玘字仲玉華亭人景泰五年進士拜監察御史陞陝西副使累陞雲南布政使終順天府尹性嚴毅與人無款曲持法深然廉直無私不爲繁瑣刻礪尹順天府權貴有所請託悉拒之坐是罷歸卒子二鳳儀鳳鳴鳳鳴字應文古貌長軀磊落多大志隨父陝西習知邊事以功

業自許讀書不泥章句爲文章疏爽有氣骨成化十七年進士知棗強縣盜賊聞風斂迹調武強卒年二十九搢紳皆悼惜之鳳儀善相人玘在外臺有聲循次當爲都御史鳳儀曰吾父終不爲此官吾弟有年位不當止此自知不壽每覽鏡輒不怡果三十六卒

顧志名臣

曹泰字時和華亭人居皇甫林景泰五年進士性淳慤以訟事有連罷不敘英宗復辟有白其冤者名偶同景帝年號又景帝時所舉士也遂不果用居數月朝會得匿名書下部考驗憾泰者誣焉上聞曰必此人也恨我廢斥耳詔逮問緹騎疾馳入郡時松江知府某與泰同年

素高其誼竭資賂焉已同使者抵泰門請先入泣而語  
之故曰子亡如何吾爲任罪曰君命也何所逃檻車詣  
司隸考掠備至不勝楚毒遂誣服繫獄至冬朝讞有擊  
登聞鼓而號者曰投書人在也曰者小人有母今亡矣  
吾爲吾母而負吾君今又以負他人吾何面目立於天  
地閒耶請就法訊之則故中書某耳泰乃得釋而支體  
已廢歸富林里以詞翰自娛時人語曰富林二曹二曹者泰  
與其弟一時人豪所著有九峯集陳志賢達

張祚字永錫華亭人登景泰五年進士拜山東道監察御史巡視北畿承烽火之餘民力未復祚旌表節義而軫

卹窮匱申理冤抑平反巡檢曹旺等數人天順改元巡  
淮揚尋以憂歸服闋起廣東按察僉事東莞縣第五都  
有虛糧千餘祚均之於一邑南海縣富民袁銀兄弟爭  
田祚反覆勸導銀悅服願自輸千石以贖過適高州大  
飢卽以其粟賑之會有藤峽之役韓中丞雍知其才倚  
以集餉事辦而民不困雍才高性剛喜誅戮祚侃然陳  
言韓屈意從之多所全活祚時帥偏師積級四千四百  
有奇皆真賊也東莞豪潘普欲爲亂知縣吳中請發兵  
祚不應遣人招諭得其首惡而不問脅從反側遂安民  
得樂業新興新會二縣間山隘箐密民習於亂每他盜

入境輒起應之僉議乘大兵之威芟難無遺育公曰民  
也不可與搖獠等誅其魁而已縛七十人下獄而釋其  
孥五千餘始興縣武弁陳顏瑄殺無罪者三千人以冒  
功邀賞韶州指揮趙寧豪橫攘奪皆致於法藤峽平先  
是大兵之出以閩人爲監軍至粵三司莫不致敬而祚  
無加禮雖積勞九載第進河南副使蓋中人阻之也輒  
論爲之不平而祚欣然無纖豪歎望在任三載以母老  
告歸家居十餘年卒

吳騏集

顏正字廷表華亭人裔出元平章伯顏後景泰五年進士  
授南京監察御史清正有聲南宮復辟諸巧宦者多依



徐石取高位正清介自守數歲不遷擢爲四川按察司  
僉事燭民隱鋤豪强威令大行陞松潘兵備副使松潘  
地處極邊始至值洞寇趙鐸反正以兵饑未集士氣未  
振姑以撫餌之乃單騎入賊壘宣威德鐸素聞其名强  
橫稍戢潛遣謀入城正廉得之爲治具好語遣去鐸意  
大安正知不設備簡精銳潛擊之遂擒鐸餘衆解散全  
蜀安堵事聞璽書褒美延議謂正習邊事宜推巡撫正  
念父母年高乞終養歸家居閉門謝客戒閭人凡軒冕  
至勿與通張東海弼與正同筆硯且同年生出守南安  
詣正言別亦不得見乃寄詩敘舊正乃訂期邀之聯榻

夜話其耿介絕俗多類此卒年五十五

吳騏集

李清字希憲上海人長史伯璵子也少博學十七舉於鄉  
登景泰五年進士授工部主事改南京刑部郎獄多平  
反以服闋補官時冢宰姚夔爲長史門人欲留清謝曰  
荷公盛意恐不知者謂清有所干夔歎曰希憲眞君子  
也改南兵郎陞河南右參議改四川右參議松潘用兵  
民賴以蘇遷左參議尋遷右轄在蜀十年清謹一節轉  
湖廣左轄終於官年五十二所著有容軒集自警篇武

經集註傳於世

陳志賢達

王珪字廷玉衛城人少入衛庠與羅義齊名景泰庚午義

魁南畿珪誓不第不過其門癸酉舉於鄉五年甲戌成進士珪性剛介成化中郡守有恣科罰者珪佯立券貸之守慙而罷邑令某酷暴珪使人持其杖而歸暴亦少止仕至少參卒

金山志

顧祥字廷吉華亭人景泰七年鄉舉除都察院司務累陞保寧府知府以廉吏稱三原王端毅撫南畿重其清節題贊憲坊以表之在縣治東數十武歲久傾幾廢嘉靖辛亥韋軒黃公來令首詢其家有孫中道爲弟子員黃公曰顧公廉吏王端毅先朝名卿其興建之迹不可不傳捐廩助修不踰月告成何良俊作存舊歌紀之

陳志賢達

高祐字天錫上海人本姓王父鉉贅於高因從其姓景泰四年舉人成化丙午授泉州同知泉多山谿民倚險爲梗祐訓以德義強梁者悉從化積逋不督而集凶年貸民粟以山鄉遠召從化者總授而分給之遠近稱便嘗道漳州宿山間有負豪家債而憤其偪者聚千人期旦日殺豪豪亦號召爲敵佑知之俾館人往諭以禍福片言而散一日令所部市茶其人密置銀二錠以進佑啟之笑曰爾謂我有求耶卻還之屏其人弗復接丁外艱歸部民送者千數爭攜金錢跪贖皆不受至泣而退歷廣平東昌二府操履如一晚居邑西一室蕭然晏如也

陳志  
賢達

李祥字廷瑞華亭人天順元年進士令崇仁新學宮清隱  
稅俗富豪每陵貧弱祥諷遣子弟一人入學然後召其  
人至縣庭禮貌之曰是家今讀書習禮義者也由是富  
豪各懷慙不敢恣修黃州橋屋五十餘間民便之置豫  
備倉五所貯穀數萬石成化初縣饑民得不困旱禱雨  
立應勤苦清慎九年如一日祀崇仁名宦

陳志  
賢達

談倫字本彝上海人居鶴坡里天順元年進士長身豐頤  
瑩然玉立時王忠肅翱爲冢宰輕南士見倫瞿然曰南  
方有此人邪授驗封主事轉員外郎中忠肅每入見輒

以倫隨上問之公以名對曰臣老矣於聖諭恐有遺忘  
此郎代臣志之且其人可信也上因欲大用之忠肅謂  
年少資淺他日用之未晚丁母憂服除補虞衡司擢應  
天府丞是年鳳陽大水守者匿不以聞倫自署奏詔免  
秋糧數萬進尹應天改順天至工部右侍郎與尹旻善  
會萬安李孜省逐旻倫亦罷歸卒子田字舜于構園亭  
好吟詠四方紳士過之必流連觴詠臨行饋遺豐厚有  
古俠士風槩今所行談箋乃其家遺製也從孫承儒嘉  
靖元年舉人力學不與世事爲衢州司理卒於官所著  
有且適園稿

上海志

宋瑛字克輝華亭人居蕭塘弱不好弄少長卽嗜學時兄  
瑛已貴父欲令業賈瑛涕泣辭讀書窮晝夜當食饘粥  
一甌冬菹一枰而已人不能堪瑛處之晏然旣領鄉薦  
攻苦益力天順元年成進士廷試第四人授工部營繕  
司主事典徒役與中貴人雜居首絕干請屏豪猾鉤考  
積弊人憚其嚴而樂其坦易然中貴人滋不悅思中傷  
之陰使人詐爲傭以伺其過歲餘無所得更得其廉謹  
數事加敬禮焉引疾歸年始四十五乃作延齡會以合  
族其子弟願學者具館穀教養之事母至孝居喪哀毀  
有燕乳白雛於堂時人以爲孝感

顧志  
名臣

唐珣字廷貴華亭人天順元年進士授四川合州知州鋤  
疆植弱有能聲陞南京刑部員外郎郎中出爲福州知  
府時亢旱珣入境卽雨人相賀故事當先謁藩府珣獨  
詣署卽視事有妄男子詐爲中貴人汪直入閩勢張甚  
僉事以下多被摧辱莫敢誰何珣獨疑之乃壁人於浴  
室窺之得實卽座止執之置諸法諸司駭服陞湖廣右  
參政布政使尋入爲順天府府尹畿輔繁劇珣守法奉  
公事悉辦性强直執法不回豪右不敢放手陞右副都  
御史整飭薊州等處兵備兼巡撫順天等府以憂去服  
且闕命卽家起之陞右都御史總督兩廣軍務兼理巡



撫嶺海府衛州縣咸畏其威旋以破賊寨功賜金幣降

敕獎諭宏治八年卒賜祭葬如例

顧志名臣

顧英字孟育上海人天順三年舉於鄉任廣西府同知民有楊姓者兄弟爭產各以百金入賂英佯許之比至公庭弟訴兄多匿財五十金英諭之曰若爭五十金乃以百金求勝乎顧吏人出其賂分償之兩人愧服改任延安值歲饑先開倉賑濟後詣撫院免冠謝擅發粟罪撫院嘉獎遷知廣南府屬車里警殺宣慰板雅氏者死嫡庶爭立撫按檄英往冒險行千餘里卒定其事致政歸田構南溪草堂賦詩自適子澄成化中輸粟千石以賑

飢民詔授承事郎孫定芳自有傳

上海志

何震字以仁華亭人由歲貢選涇陽教諭規言矩行爲文亦謹守繩尺時人重之沒祀鄉賢

奉賢志

張悅字時敏華亭人天順四年進士官刑部員外郎成化中督學浙江力拒請託校士不糊名曰吾取自信而已孝宗立累官吏部侍郎嘗兩攝選事衆稱公允宏治六年大旱求言陳遵舊章卹小民崇儉素裁冗食禁濫罰數事又上修德圖治二疏竝嘉納遷南京右都御史改吏兵兩部尙書以年老乞休詔加太子少保馳傳歸卒

贈太保諡莊簡

明史參修先進舊聞

王霽字景明上海人天順四年進士授南京刑部主事歷  
郎中出守黃州州多虎時有火災又江水常暴溢壞民  
廬舍霽祈祝輒應民愛信之遷廣西參政未幾遷江西  
按察使宏治初晉太僕寺卿條奏馬政十事報可用薦  
巡撫山東值歲饑霽區畫銀五十餘萬兩米二百餘萬  
石賑之存活甚衆召拜大理寺卿宏治元年卒賜祭葬  
子泰字時暘宏治十二年進士以刑部主事理漕淮揚  
弛軍士淹禁者百人去日籍公帑若干緡築石堤數百  
丈以防湖漲遷主客員外郎時奄瑾專政賞賜屬國多  
紊舊例泰上疏復之擢太常丞出爲江西參議值饒信

姚源盜起都御史俞諫檄泰軍前督餉倚其力用俘獲  
男女具訪鄉里親戚還之事竣賜白金文綺先是柄兵  
者議撫東鄉賊渠授以冠帶泰不可主議者疾之遂謝  
事歸泰嫡長應得父大理卿廕不以屬子而讓庶弟臨

尤人所難

上海志

計瓊字廷玉上海人天順六年鄉舉任封邱令潔己惠民  
治行稱廉平以不能事上官乞歸閉門教授謂其友張  
弼曰古之仕以行志今之仕以行勢降志從時吾不能  
吾且歸浦上讀古人書以安吾素足矣曾孫安邦自有

傳

雲間往哲錄

董綸字誠之號介軒上海人天順七年進士除上饒令上饒故殷庶綸嚴期會賦易集邑居踐更吏緣爲奸利乃總會而劑均之歲饑貸民故事軍不得與綸曰獨非吾民邪均貸之相土所宜教之樹藝縣以饒民取山木軍冒奪之綸合鋸迹觀之立判懸官量爲民式市僧私造二斛踰制一日雷震碎其斛於縣庭凡祈禱輒應擢南御史掌河南道事罷歸又七年卒子恬忱懌字世良宏治九年進士初授工部主事改刑部錄囚浙江獄獄稱明允正德戊辰晉大理少卿癸酉罷忱字世恆與恬同榜登進士仕肇慶府知府懌字世康廉直著稱薦經

明行修觸時譏罷後以鄉薦知磁縣二州多惠政嘗發

僉事某奸因自劾致仕

上海志

戴春字景元弟曦字景暉受業於周廷參同領景泰元年

鄉薦春成天順七年進士歷官順慶知府曦學優才敏

外坦內嚴授中書舍人遷刑部員外郎卒於官

陳志賢達

楊周字起東華亭人居漕涇以俠節聞當世賢豪皆折節

禮之兄伊故雄於貲悉以授周周撫其孤躬自經理絕

無所私族有利其產者思中以危法周恩遇之其人愧

而止周雖布衣而里中敬服得其一言爲重郡邑長賢

其才有周甲者爲族人所窘因令周勸諭歸其侵田甲

餽五百金不受一大賈持金三千寄周遲十年乃至以  
所權子母悉償之他行事類如此

郭志  
獨行